

Ekap kânok Yohaneņâ kulengoip.

Ândiândigât den sâm muyageip.

1 ¹Topkwap mârumņan gâbâ zem gâip, oi kindapniņâ nâņgâwen sot sinniņandâ igâwen. Ek nâņgâm kwâtâtemņâ bitniņandâ gâsuwen, zo ândiândigât den sât. ²Ândiândi mariņâ zo muyagei igâwengât ândiândi kâtikņangât siņgi den dâzâņgomen. Ândiândi kâtikņâ zo Anutu Ibâgâren zem gamņâ neņgâren gâip. ³Zorat kut ñâi ñâi ek nâņgâwen, zorik zen dâzâņgomen. Zen sot nen sot Ibâ sot nanņâ Yesu Kristo kâmut kânok utnatkât sâmen. ⁴Yatâ muyagei sâtâre kwâkņan ândinatkât ekap zi kulemgum ziņgan.

Âsakņan ândiândiņ.

⁵Den siņgi Yesugâren gâbâ nâņgâwen, zo dâzâņgomen. Zo itâ. Anutu, zâk âsakņâ. Ñâtâtik zâkkâren mân ziap. ⁶Nen ñâtâtigân ândim Anutu sot pâlâtâņ urâwen sâindâ sâi ko sarâ opap. Oi den bonņâ mân mem ândibem. ⁷Anutu zâk zik âsakņan ândiap, zo yatik nen âsakņan ândinat zo ko kâmut kânok opņâ nanņâ Yesu Kristo, zâkkât gilâmņandâ saņgonniņgi umniņ salek upap. Yatâ oi tosanîņâ zo aksik gulipkubap.

⁸Nen bâliņâ mân upmen sânat, zo ko umniņ kâitkunat. Oi den bonņâ neņgât umniņan mân zimbap. ⁹Ka nen bâliņâniņâ sapsunat, zo ko sâi bon opmap, Anutu, târârak mariņandâ tosanîņ birâm umniņ saņgori salek op kwâtâtinat. ¹⁰Nen bâliņâ mân upmen, yatâ sâm sâi ko Anutugâren sarâ a ândimen yatâ opap. Yatâ oindâ sâi ko zâkkât den umniņan mân zembap.

Kristoņâ tânnâņgobap.

2 ¹Nan bârarâpnâ Yesugât kâmut op ândie, zen bâliņ upegât den zi kulemgum ziņgan. Neņgâren gâbâ ñâiņâ bâliņâ upap, zo ko Ibâgâren berân mâme a, Yesu Kristo, zâk târârakņâ mariņâ ândiap, zâkkât nâņgâbap. Zâk betniņan mem Ibâņâ dukui tosanîņ birâbap. ²Yesu Kristo zâk bâliņâniņangât suopniņ meip. Oi neņgârâk buņâ, hân dâp ândie aksik, zeņgât supziņ meip.

³Nen itâ nânġen. Nen Anutugât diġâ lum ândim zâk sot pâlâtânġ utnat. ⁴A ġâi, zâk Anutugât diġâ mân lumġâ itâ sâbap, “Nâ Anutu sot pâlâtânġ opman.” Zâk sarâ a. A yatâ zorat umġan den bonġâ mân zemap. ⁵Ĥâi zâk Anutugât den nânġâm lubap, zâk perâkġak umġâ Anutugâren kinbap. Nen yatik Anutugât den nânġâm lum ândimġâ itâ nânġânat, “Irak ziren Anutu sot pâlâtânġ op ândien.” ⁶Ĥâi zâk Anutu sot pâlâtânġ op ândian sâbap, zo ko Yesu ândeip, zorat dâp wâratkum ândei dâp upap.

Buku buku opġâ âsakġan ândinat.

⁷Bukurâpnâ, nâ den uġakġâ ġâi mân kulemgum ziġan. Den zo mârumġan ġâbâ nânġâm gawe, zorik. ⁸Oi den kulemguan, zo den uġakġâ oi Yesugâren sot zengâren ârândânġ bon uap. Zo topġâ itâġât. Ĥâtâtik buġ oi âsakġâ bonġâ muyagem ziap.

⁹Oi a ġâi, zâk bukuġâ kâsa okġanġâmopġâ âsakġan ândian sâbap, zâk tok ġâtâtigân ândiap. ¹⁰Oi ġâi zâk bukuġâ umġandâ ġâsubap, zo ko âsakġan ândimap. A zo bâliġan mân tâmbetagobap. ¹¹Ka a ġâi, zâk bukuġâ kâsa okġanġâbap, zo ko ġâtâtigân ândim ġâtâtikkât mâtâp âibap. Ĥâtâtigân âi siġâ egi ġâtiksâi mâtâp mân ek kwâtâtibap.

Patâ sot mâik zen aksik den nânġâbi.

¹²A ambân katep, zen Yesuġâ zengât suupziġ meip, zorat op tosaзиġ gulipkumapkât den zi kulemgum ziġan.

¹³Ibârâp, zen mârumġan ġâbâ ândim ġâip, zâk sot pâlâtânġ op ândiegât den zi kulemgum ziġan.

A sigan, zen bâliġâ mariġâ kâsa okġanġâm kâtigiwe, zorat den zi kulemgum ziġan.

A ambân katep, zen Ibâġâren pâlâtânġ urâwegât den zi kulemgum ziġan.

¹⁴Ibârâp, zen mârumġan ġâbâ ândim ġâip, zâk sot pâlâtânġ urâwegât zengât den zi kulemgum ziġan.

A sigan, zen kâtigine Anutugât den umziġan ziap. Zen bâliġâ mariġâ kâsa okġanġâm kâtigiwe, zorat den zi kulemgum ziġan.

Umniġâ hângât kut ġâi ġâiyân mân zimbap.

¹⁵Umziġ hânân mo hângât kut ġâi ġâiyân mân pane zimbap. Ĥâi zâk umġâ hângât kut ġâi ġâiyân pâi zimbap, zo ko umġandâ Anutu Ibâ mân ġâsubap. ¹⁶Nânġe. Hânân kut ġâi ġâi bâliġâ ziap, zo itâ. Sâkkât âkġâle, senġâ ekġâ âkġâle, sot umġâ zâizâiġ. Zo Ibâġâren ġâbâ buġâ. Zo hânân gokġâ. ¹⁷Hân zâk âkġâleġoot zo buġ upap. Ka ġâi zâk Ibâġât den nânġâm lubap, zâk tâmbânġ ândim zâimâmbap.

Kristogât kâsa muyagibap.

¹⁸Nan bârarâpnâ, narâk pânkânok uap. Kristogât kâsa kâwalinjoot gâbapkât sâsân, zo nânge. Oi narâk ziren kâsarâpnâ donbep muyagem gam ândie. Narâk pânkânok uap, zo nânge. ¹⁹A zo, zen osetnijan âsagiwe. Oi nenngât buku zo mân ândie. Zen nenngât buku ândim sâi nen mân birâningâbe. Zen birâningâwe, zorat topnâ itâ. Zen nenngât buku buñâ.

²⁰Zen ko tirik a Yesuñâ Kaapumñâ zingipkât nânngânânngâziñoot ândie. ²¹Zen den bonñâ mân nânngâme sâm ekap zi mân kulemgum zingjan. Buñâ. Zen den bonñâ nânngâmegât opnâ den zi kulemgum zingjan. Den sarâ, zo den bon mariñangâren gâbâ mân gâmap.

²²Yesugât kâsa, zo nâi? Yesu, zâk a bâlijan gâbâ mâkâningâbap mârum sâsân, Kristo, zo buñâ. A nâiñâ yatâ sâi zâk sarâ a sâbi. Nâi zâk Ibâ sot nanñâ kwâimbâzikâbap, zâk Kristogât kâsa. ²³Nâi zâk nanñâ kwâimbâbap, zâk Ibâ birâñangâbap. Ka nâi zâk Yesu zâk bâlijan gâbâ mâkâningâbapkât mârum sâsân sâbap, zâk Ibâ sot pâlâtân upap.

²⁴Mârumñan gâbâ Kembugât den nânngâm ândim gawe, zo nânngâne umzijan ze nânngâm ândibi. Zen yatâ op ândim nanñâ sot Ibânâ, zet sot pâlâtân op ândibi. ²⁵Yesuñâ kut nâi niñgâbapkât sâm kâtigeip, zo ândiândi kâtikñâ.

Kaapumñâ sañgonniñgi Yesugâren sâtârem kinat.

²⁶A zinj um gulip kwatziñgâbegât ekap zi kulemgum zingjan. ²⁷Zenngât itâ san. Kaapum zingip, zo zenngâren ziap, zorat wangât a nâiñâ den dâzânngobap? Kaapum zingip, zâkñâ kut nâi nâigât den dâzânngomap. Den topnâ dâzânngomap. Zâkkât den zo sarâ buñâ, zo bonñâ. Oi zen Kristo sot pâlâtân op ândibigât dâzânngoip, zo yatâ upi.

²⁸Nan bârarâpnâ, zen Kristo sot pâlâtân op ândibi. Yatâ op ândine zâk âsagem gâi kenngât sot ajun mân op mâtenjan âi kinbi. ²⁹Anutu zâk târârak ândimap. Zen zâkkât yatâ nânngâme. Zorat a nâi, zâk târârak ândei ekñâ sâbi, “Zâk Anutugâren gâbâ muyageip.”

Anutugât nan bârarâp ândien, zorat topnâ.

3 ¹Nânngânek. Ibâniñandâ nenngât umñâ donbep kinzap. Kiri nenngât nan bârarâpnâ sâmap. Oi nen yatâ zo ândien. A um kâtik, zen mân buku otningâme, zorat topnâ itâ. Zen Anutu mân buku okñangâme.

²Bukurâpnâ, nen narâk ziren Anutugât nan bârarâp ândien. Oi biken dap muyaginat? Zo mân nânngen. Ka itâ nânngâm kwâtâtien, “Kembuniñâ takâm gâi tobatnâ ekñâ yatik utnat.” ³Nâi zâk zo yatâ nânngâm um bâbâlan op ândi mâmanñâ kubikñâ târârak ândibap. Zâk Kembu târârak ândimap, zo yatik ândibap.

Bâliŋ op Satangât orot.

⁴Ŋâi zâk bâliŋ memap, zâk gurumin den komap. Gurumin den kukuŋâ, zo bâliŋâ bonŋâ uap. ⁵Yesugât itâ nâŋgâme, “Zâk bâliŋâ maatibam geip. Oi zâk bâliŋâ mân oip.” ⁶Oi ŋâi zâk Yesugâren pâlâtân op ândimapŋâ bâliŋ mân opmap. Ka ŋâi zâk bâliŋ opmap, zâk zo Yesu mân ek nâŋgâmap.

⁷Nan bârarâpnâ, ŋâiŋâ um gulip kwatziŋgâbâ sâi mân nâŋgâbi. Ŋâi zâk târârak mâtâbân âibap, zâk târârak a. Yesu târârak ândimap, zo yatâ ândibap. ⁸Ka a ŋâi, zâk bâliŋ opmap, zâk Satangât a. Satan zâk topŋan gâbâ bâliŋâ tuum ândim gâip. Yatik ândiap. Oi Anutugât nanŋâ zâk Satangât nep kândanŋbam geip.

Anutugât nan bârarâp ândim bâliŋ mân orot.

⁹Anutuŋâ kâmut gakârâpŋâ ândiândigât kâwali ziŋgip, zorat zen dap dabân yatâ bâliŋâ mem ândibi? Zen Anutugâren gâbâ gokŋâ, zorat bâliŋâ mân upme. ¹⁰Anutugât nan bârarâp sot Satangât nan bârarâp, zengât topziŋâ itâ muyagei iknat. Ŋâi zâk ândiândi târârak mân ândibap, zâk Anutugâren gâbâ gokŋâ buŋâ. Oi ŋâi zâk bukuŋâ kâsa okŋangâbap, zâkkât yatâ Satangâren gokŋâ sâsân.

¹¹Kembugât den mâruman gâbâ nâŋgâm gawen, zo itâ, “Umziŋandâ gâsâyagom ândibi.” ¹²Adamgât nanŋâ Kain, zâkkât mâtâp mân lâŋnat. Zâk bâliŋ mariŋangâren gâbâ gokŋâ, zorat munŋâ koi moip. Zo itâgât. Zikŋâ ândiândiŋâ, zo bâliŋâ. Munŋangât ândiândiŋâ, zo âlipŋâ. Zorat op ko koi moip.

Yesuŋâ buku otniŋgipkât buku orangânat.

¹³Bukurâpnâ, um kâtik ziŋâ kâsa otziŋgâne nâŋgâne ŋâi mân upap. ¹⁴Nen bukurâpniŋ buku otziŋgâm ândiengât niŋangât itâ nâŋgâmen. Mumuŋan gâbâ ândiândiyân bagiwen. Ŋâi zâk bukuŋâ buku mân okŋangâbap, zâk tok mumuŋan ândibap. ¹⁵Oi ŋâi zâk bukuŋâ kâsa okŋangâbap, zâk kâmbam ku a yatâ, a kuktâ. Zen itâ nâŋgâme, “Kâmbam ku a zengât umziŋan ândiândi kâtik mân muyagem ziap.” ¹⁶Yesu zâk nengât op ândiândiŋ biri buku orotŋangât topŋâ iksen. Oi nen yatigâk bukurâpniŋ zengât op ândiândiniŋ birindâ dâp upap. ¹⁷Ka a ŋâi hângât sikum zemŋangâi bukuŋâ wan mo wangât kwakpap oi ekŋâ mân nâŋgâŋangâbap, zâk dap yatâ umŋandâ Anutugâren kinbap? Zo buŋâ.

¹⁸Nan bârarâpnâ, buku orotŋâ, zo den mo sâtŋak mân sâsân. Betŋâ sot umŋâ utnat. ¹⁹Yatâ oindâ den bonŋangât kâmurân ândien, zorat topŋâ muyagei nâŋgânat. Oi Anutu mâteŋan umniŋâ kengât buŋ ândinat. Anutu mâteŋan umniŋâ kengât opapkât itâ nâŋgânat. ²⁰Umniŋandâ kengât oi itâ sânat, “Anutu zâk umniŋangât dâp buŋâ. Zâk tobat ŋâi ândim kut ŋâi

ņai aksik zo nāngām nanġāmap.” Zorat nen keņġāt kândâtkum zâkkâren nāngām pâlâtāņ kwâkņanġām ândinat. ²¹ Bukurâpnâ, umniņandâ keņġāt mân oi Anutu mâteņan umâlip ândinat. ²² Oi diņâ lumņâ zâkkât mâteņan kut ñai ñai oindâ egi âlip opmapkât zâkkâren wan mo wangât sâindâ niņġāmap. ²³ Zâkkât gurumin den itâ ziap, “Nanņâ Yesu Kristo nāngām pâlâtāņ kwapņâ umziņandâ gâsâyagom ândibi.” Nen yatâ utnakât Yesuņâ sām niņġip.

²⁴ A zen Anutugât den lume, zen zâk sot pâlâtāņ op ândime. Zâkoot zen sot pâlâtāņ opmap. Anutu zâkņâ Kaapumņâ niņġip, zorāņ sapsum niņġi nāngāmņâ itâ nāņgen, “Anutu zâk nen sot ândimap.”

Tirik Kaapum sot wâke, zeņġât den.

4 ¹ Bukurâpnâ, a den sâme, zo yen mân nāņġâbi. Den zorat topņâ nāņġām sâlâpkum ikpi. Den zo Satanġâren gokņâ mo Anutugâren gokņâ, zo nāņġâm ândibi. Wangât, propete a sarāņâ doņbep muyagem ândie, zorat. ² Den Anutugât Kaapumân gokņâ, zen itâ ikpi. A ñai, zâk itâ sâbap, “Yesu zâk a bâliņan ġâbâ mâkâniņġâbapkât sâsâņ, Kristo, zo zâk hânân muyageip.” Den zo yatâ sâi ko Anutugâren ġâbâ âsageip. ³ Oi a ñaiņâ Yesugât itâ sâbap, “A bâliņan ġâbâ mâkâniņġâbapkât mârum sâsâņ zo, zâk buņâ. Zâk a yenņâ op hânân muyageip.” Den zo yatâ sâbap, zo ko den zo Anutugâren gokņâ buņâ. Den zo Kristogât kâsanġâ yatâ opap. Kâsa zâkkât itâ nāņġâme. Kâsa zâkkât imbaņâ hânân muyagibapkât sâsâņ, zo mârum zi muyagiap.

⁴ Nan bârarâpnâ, zen Anutugâren gokņâ, zorat ziņâ propete sarāņâ zen sot agom kâtigemņâ kâsa otziņġâwe. Oi zeņġât umziņan ândiap, zorāņâ propete a sarâ zeņġât umziņan ândiap, zo walâmap. ⁵ Propete sarāņâ zen hânân gokņâ, zorat hāņġât den sâne um kâtik a ziņâ nāņġâme. ⁶ Nen ko Anutugâren gokņâ. A Anutugât den nāņġâme, zen dinniņâ nāņġâbi. Ka ñai zâk Anutugâren gok buņandâ dinniņâ mân nāņġâbap. Den bon mariņâ, Kembugât Kaapumņâ sot Sataņ arâpņâ, zeņġât topziņ yatâ âsagei iknat.

Anutuņâ buku otniņġip, zorat topņâ.

⁷ Bukurâpnâ, nen umniņandâ gâsâyagom ândinat. Buku orotņâ, zorat topņâ Anutu. Ñai zâk bukurâpņâ buku otziņġâmap, zâk Anutugâren ġâbâ muyageip sot Anutu sot pâlâtāņ opmap. ⁸ Ñai zâk bukurâpņâ mân buku otziņġâmap, zâk Anutu mân ek nāņġâmap. Buku orotņanġât topņâ Anutu. Anutu umņandâ gâsânāņgom buku otniņġâmap. ⁹ Anutuņâ nanņâ kânok ândiândi muyageniņġâbapkât sâņgongoi hânân gem ġâip. Anutu umņandâ gâsânāņgom yatâ otniņġip. ¹⁰ Buku orotņanġât topņâ itâ ziap. Nen Anutu mân buku okņanġâwen. Zâkņâ buku otniņġâm nanņâ sâņgongui gemņâ bâliņâniņanġât suupņâ mem moip. Zorat nen Anutu mâteņan um salek kinat.

Anutuŋâ buku otningâmap yatik neŋgoot buku otziŋgânat.

¹¹Bukurâpnâ, Anutuŋâ buku otningipkât neŋgoot yatik umŋâ buku buku oraŋgânat. Nen yatâ oindâ dâp upap. ¹²A sinniŋandâ Anutu mân igâwen. Um buku oraŋgâm ândinat oi ko Anutu zâk nen sot pâlatâtŋ oi buku orotŋâ bonŋâ neŋgâren muyagem kwâtâtibap. ¹³Zâk Kaapumŋâ niŋgip, zorat itâ nânŋen. Zâk nen sot pâlatâtŋ opmap. Nen zâk sot pâlatâtŋ upmen.

¹⁴Ibâ zâk nanŋâ hân dâp a nen kubikniŋgâbapkât sâŋgongoi geip. Oi nen sinniŋandâ igâwengât den zo sâŋ muyagem dâzâŋgomen. ¹⁵Oi a ŋâiŋâ, Yesu zâk Anutugât nanŋâ sâbap, zâk Anutu sot pâlatâtŋ upap. Oi Anutuŋâ zâk sot pâlatâtŋ upap. ¹⁶Zo yatâ oi itâ nânŋen, “Anutu umŋandâ gâsânâŋgomap.” Zo ek nânŋâm kwâtâtien.

Anutu zâk buku orot zorat mariŋâ. Ŋâi zâk buku upapŋâ Anutu sot pâlatâtŋ upap. Oi Anutuŋâ zâk sot pâlatâtŋ upap.

Buku op keŋgât mân utnat.

¹⁷Biken den sâŋ kwâkâkwâkâŋ narâkŋan keŋgât buŋ kinatkât Anutuŋâ buku otningip. Oi Yesuŋâ buku otningâm ândimap, zo yatik hânân zi buku oraŋgâm ândinat. ¹⁸Keŋgât sot buku, zet buku buku buŋâ. Buku bonŋandâ keŋgât molibap. Keŋgât, zo tosagât hâuŋâ zo nânŋâm upme. Ŋâi zâk keŋgât mem ândibap, zâkkâren buku mân muyagiap sâsâŋ.

¹⁹Nen ko Anutuŋâ kâdom buku otningipkât buku op ândimen. ²⁰Ŋâi zâk Anutu buku okŋaŋgâman sâŋ bukuŋâ kâsa okŋaŋgâbap, zâk sarâ a. Nânŋânek. Ŋâi zâk bukuŋâ senŋâ igikŋâ buku mân okŋaŋgâmŋâ dap op Anutu mân igikŋâ, zo buku okŋaŋgâbap? ²¹Yesugât den itâ ziap, “Aŋâ Anutu buku okŋaŋgâmŋâ bukuŋâ buku okŋaŋgi dâp upap.”

Anutu sot pâlatâtŋ op ândinat.

5 ¹A ŋâiŋâ, Yesu zâk a bâliŋan gâbâ mâkâniŋgâbapkât mârum sâsâŋ zo, sâŋ nânŋâm pâlatâtŋ kwâkŋaŋgâbap, zâkkât Anutugât nanŋâ sâsâŋ. Oi ŋâi zâk Ibâ muyamuyagiŋ buku okŋaŋgâbapŋâ Ibâgât kiurâp yatik buku otziŋgâbap. ²Nen Anutugât nan bârarâp buku otziŋgâmen? Buku otziŋgâmen, zo ko Anutu buku okŋaŋgâm, zâkkât den lugindâ, zorâŋâ topniŋ sapsubap. ³Anutu buku yen mân okŋaŋgânat. Diŋâ lum buku okŋaŋgânat. Anutugât den zo yâmbâtŋâ buŋâ. ⁴Anutugâren gâbâ muyagiwen, nen um kâtik a zengât orot mâme walâziŋgâmen. Itâ opŋâ walâziŋgâmen. Nen Kembugâren nânŋâm pâlatâtŋ kwâkŋaŋgâm ândim hângât imbaŋâ zo kom birâm walânat. ⁵Ŋâiŋâ kâtigem kin hângât âkâk gâlâk zo koi gibap? A ŋâi zâk, Yesu zâk Anutugât nanŋâ sâŋ, nânŋâm pâlatâtŋ kwâkŋaŋgâbap. A zorâŋ bonŋâ upap.

⁶Yesu Kristo zâk sumbemân gâbâ hânân geip. Hânân ândim toin giari Yohaneŋâ saŋgonŋaŋgip. Oi a ziŋ poru nagân kune gilâmŋâ gem gâip.

Tooyâk bujâ. Too sot gilâm ârândân. ⁷Oi Kaapumjâ Yesugât topjâ sâam muyagemap. Oi Kaapum zâk den bonjângât marijâ. Sarâ mân sâmap. ⁸Karâmbut zijâ tânagom kin topjâ sâam muyagime, zen Kaapum sot too sot gilâm. Karâmbut zen zâkkât den kânok sâme. ⁹A zij tânagom den sâme nângindâ bonjâ opmap. Oi Anutuujâ den njâi tângoi walâmap. Anutuujâ den njâi sâi bonjâ opmap. Anutugât tân den zo nanjângât den zo sâi muyageip. ¹⁰Îjâi zâk Anutu nanjâ nângâm pâlâtân kwâkjangâbap, zâk Anutugât den bonjâ nângâmap. Îjâi zâk Anutugât den mân nângâbap, zâk Anutugât sarâ a sâbap. A yatâ zorân Anutuujâ nanjângât den tângoip, zo nângi bon buj upap. ¹¹Oi Anutu nanjângât den tângoip, zo itâ muyageip. Anutu zâk ândiândij kâtik muyagem ningip. Ândiândi kâtik zo neŋgât siŋgi sâi nanjandâ galem oi ziap. ¹²Îjâi zâk nanjoot pâlâtân upap, zo ândiândi kâtik mimbap. Ka njâi zâk nanjâ sot pâlâtân mân upapjâ ândiândi kâtik mân muyagibap.

Ninâu sot bâliŋgât den.

¹³Zen ândiândi kâtik miwe, zorat nângâbigât ekap zi kulemgum zijgan. Zen nanjângâren nângâm pâlâtân kwatne ândiândi kâtik zemziŋap. ¹⁴Nen itâ sâam Anutu umâlep nângânjângâmen. Nen wan mo wangât zikŋak nângi ziap, zorat ninâu sâindâ nângâniŋgâbap. ¹⁵Zorat opjâ wan mo wangât ninâu sâindâ nângâniŋgâbap. Zorat nângâm itâ nângânat. Kut njâi njâi zo neŋgât siŋgi sap.

¹⁶Îjâi zâk bukuŋandâ bâliŋ oi ikpap, (Bâliŋjâ zo simgât siŋgi mân muyagibap.) zo ekjâ zâkkât opjâ ninâu sâi ândibap. Bâliŋjâ nâmbutjâ opjâ simgât siŋgi mân upi. Bâliŋjâ yatâ zorat san. Oi bâliŋjâ njâi opjâ simgât siŋgi orotjâ, zo ziap. Yatâ zorat ninâu sâbigât mân san. ¹⁷Ândiândi bâliŋjâ top top zo bâliŋjik. Oi bâliŋjâ torenjâ zo simgât siŋgi mân uap.

¹⁸Nen itâ nângâmen. A mo ambân Anutugâren gâbâ muyageipjâ bâliŋjâ mân opmap. Anutugât nanjandâ galem oi bâliŋjâ marijandâ mân tâmbetkubap.

¹⁹Nen Anutugâren gâbâ muyagiwen. Oi hân dâp a zie, zen ko bâliŋ marijângât bikŋan ândie. Zo yatâ nângâmen.

²⁰Anutugât nanjâ, zâk gemjâ um nângânângâ muyagem ningipkât den bonjâ marijâ nângâm pâlâtân kwâkjangâmen. Oi den bon marijâ sot nanjâ Yesu Kristo, zet sot pâlâtân op ândimen. Zâkŋjâ Anutu bonjâ sot ândiândi kâtik marijâ.

²¹Nan bârarâpnâ, zen Bem lopio kândâtzângom ândibi.
Zo yatik.